

15 hoben di grupo number 5 di SVT a haya nan certificado na Fort Zoutman



DIALUNA den oranan di atardi 15 hoben di grupo number cinco di e Sociaal Vormingst-

raject (SVT) a haya nan certificado. Esaki a tuma luga den fort Zoutman na unda tabata

reina un bunita y dushi ambiente. E ceremonia a wordo presentá pa e elocuente maestro

di ceremonia Adonsito Croes. Loke a domina e atardi tabata hobennan contento, mayornan orguyoso, lidernan militar y civil cu a guia e adultonan hoben durante un aña largo, esnan cu a ofrece nan un lugar pa core stage y tur presente tabata duna muestra di satisfaccion cu nan envolvimento cu e hobennan aki. Nan tabata expresa nan sentimentonan di orguyo. Prome Minister Mike Eman, iniciado di e proyecto SVT, hunto cu Jessie Ras, coordinadora di proyecto, a haci entrega di e certificadonan. Diferente miembro di Parlamento di Aruba tabata presente na e ocasion special aki, entre nan Desiree Croes, Rene Herde, Donny Lacle, Lorna Varlack y Mervin Wyatt-Ras. Tur hende ta convenci cu esaki ta un tremendo proyecto, na unda hobennan ta wordo brinda un di dos oportunidad den bida. Ora cu nan caba y nan logra, e orguyo y satisfaccion ta na prome luga pa nan mes, nan mayornan y tur cu a guia nan den e proceso cu nan a pasa aden. Un proceso cu no semper tabata facil, pero manera un di nan a bisa e grupo di hobennan

cu ta den e proceso actualmente 'si ami por, boso tambe por!' E hoben Danny Maduro cu un mama super orguyoso para banda di dje tabata esun cu mas a resalta durante e aña cu ta tras di lomba. For di man di Prome Minister Eman el a ricibi un bunita plakkaat cu e texto apropia 'Perseverancia ta e yabi di tur exito'. Durante e ceremonia a tuma despedida di Teniente Lorenzo Texeira, kende ta bandona servicio militar y ta bay traha na KIA. E ta wordo reemplaza pa e hoben Teniente Moises Henriquez. E atardi tabata bunita, un tremendo proyecto cu cada bes di nobo ta radia postivismo, palabranan bon escogi dirigi na e hobennan durante un bon esfera ta e impreson cu ta keda den memoria di tur presente.



Tel: **583-1400**
Fax: **583-1444**

Facebook:
www.facebook.com/awemainta

Website: www.awemainta.com

E-mail: noticia@awemainta.com